

Gweinidog yn agor ysgol Gymraeg newydd



Mae ysgol cyfrwng Cymraeg newydd i blant rhwng tair a 16 mlwydd oed wedi ei hagor yn swyddogol yn Hwlfordd gan y Gweinidog Addysg, Kirsty Williams AC.

Ysgol Caer Elen, sydd gwerth £28 miliwn, yw'r enghraifft gyntaf o fuddsoddi mewn addysg uwchradd cyfrwng Cymraeg yn yr ardal yma o Sir Benfro erioed.

Dim ond un ddarpariaeth uwchradd cyfrwng Cymraeg arall sydd ar gael drwy'r sir, a hynny yng Nghrymbych, sy'n daith o dros 45 munud i rai sy'n teithio yno o'r de neu o ganol y sir.

Mae Ysgol Caer Elen - sydd yn agored i ddisgyblion ers mis Medi - yn un o nifer o ysgolion sydd wedi eu hadeiladu, neu sy'n cael eu hadeiladu, o dan y Rhaglen Gyfalaf i Sicrhau Addysg ac Ysgolion ar gyfer yr 21ain

Ganrif - menter gwerth £120 miliwn rhwng Cyngor Sir Penfro a Llywodraeth Cymru i adeiladu ysgolion o'r radd flaenaf.

Mae'r datblygiad yn darparu:

- Meithrinfa sydd â lle i 45
- darpariaeth cynradd sydd â lle i 315
- ysgol uwchradd sydd â lle i 600
- Cylch Meithrin sydd â lle i 24

Mae hefyd cae chwarae pob tywydd ar gyfer defnydd cymunedol tu allan i oriau ysgol.

Cafodd y Gweinidog groeso cynnes i'r ysgol yn gynharach heddiw (dydd Iau, 14 Mawrth) gan Aden Brinn, Cadeirydd Cyngor Sir Penfro, a'r Pennaeth, Michael Davies.

Dywedodd Mr Davies ei fod yn gyfnod cyffrous i'r Gymraeg yn Sir Benfro gan fod y Sir wedi gweld y cynnydd mwyaf yn nifer y siaradwyr Cymraeg yng Nghymru – cynnydd o 10 y cant i 30 y cant ers 2008.

Cyn dadorchuddio plac, dywedodd Kirsty Williams wrth y plant: "Rydwn i mor falch o fod yma heddiw i agor yr ysgol newydd arbennig hon.

"Drwy'r Rhaglen Gyfalaf i Sicrhau Addysg ac Ysgolion ar gyfer yr 21ain Ganrif, rydym yn gweithio ag awdurdodau lleol i fuddsoddi mewn codi adeiladau sydd wedi eu cynllunio'n dda, sy'n ddiogel ac yn effeithlon o ran ynni, sy'n bodloni anghenion dysgwyr, athrawon a'r gymuned ehangach, ac sydd wir yn gweddu i'r 21ain Ganrif.

"Mae Caer Elen yn enghraifft berffaith o'n buddsoddiad mewn addysg Gymraeg, er mwyn ceisio sicrhau ein bod

yn cyrraedd y nod o filiwn o siaradwyr Cymraeg erbyn 2050.

“Mae’r ysgol newydd yn gweithredu fel canolfan Gymraeg, yn cynnig addysg Gymraeg ragorol mewn cymuned sydd yn draddodiadol ddi-Gymraeg.

“Mae hefyd yn wych bod plant rhwng tair ac 16 oed yn cael dysgu o dan yr un to.

“Bydd hyn yn galluogi’r plant i ddysgu mewn amgylchedd lle mae’r staff dysgu a’r dosbarthiadau’n gyfarwydd iddynt, a manteisio ar beth fydd y cysondeb hwn yn ei gynnig i’w profiad dysgu.”

Aeth hi ymlaen wedyn am daith o amgylch yr ysgol newydd.

Dywedodd David Lloyd, Aelod Cabinet y Cyngor Sir dros Addysg a Dysgu Gydol Oes, bod y cyfleuster newydd yn mynd i’r afael â’r galw cynyddol am ddarpariaeth addysg cyfrwng Cymraeg yn ne, canol a gogledd orllewin Sir Benfro.

Aeth y Cynghorydd Lloyd ymlaen i ddweud: “Mae heddiw’n ddiwrnod hanesyddol i’r iaith Gymraeg yn Sir Benfro.

“Mae agor ysgol uwchradd iaith Gymraeg, newydd sbon, yng nghanol lle a elwid ynghynt fel ‘Lloegr Bach Tu Hwnt i Gymru’ yn gam ymlaen syfrdanol i addysg cyfrwng Cymraeg ein Sir. Rwy’n llongyfarch unrhyw un a fu’n gweithio er mwyn sicrhau bod hyn yn bosibl.”

Ychwanegodd y Cynghorydd Cris Tomos, Aelod Cabinet yr Awdurdod dros yr Amgylchedd a’r Iaith Gymraeg:

“Mae Ysgol Caer Elen yn gyfleuster arbennig, ac mae’n

deyrnged i bawb a fu'n brwydro dros gael ysgol uwchradd cyfrwng Cymraeg yn Hwlfordd.

“Mae'n ddatganiad gwych sy'n dangos bod Cyngor Sir Penfro yn gwbl gefnogol o statws yr iaith Gymraeg.”

Willmott Dixon oedd y prif contractwyr ar gyfer y prosiect.

Penawdau

Plac: Kirsty Williams AC gyda'r disgyblion Cerys Knight a Summer Othen ar ôl dadorchuddio'r plac. Gyda nhw mae'r pennaeth Michael Davies (chwith) a'r Cynghorydd Cris Tomos.

Microsgop: Kirsty Williams AC mewn gwern gwyddoniaeth gydag Evan Mackeen, disgybl. Gyda nhw, o'r chwith, mae Tristan Lewis, y pennaeth Michael Davies a'r Cynghorydd Aden Brinn.

